

四庫全書

集部

欽定四庫全書

集部

雙溪集卷十一

九至

詳校官右中允臣薩敏

主事臣呂雲棟覆勘

總校官進士臣繆琪

校對官原任典簿臣郭祚熾

謄錄監生臣胡騰蛟

欽定四庫全書

雙溪集卷九

宋 蘇籀 撰

劄子并議盜賊一首

面對論和戰劄子

臣聞禹抑洪水拔萬世之患高宗伐鬼方三年克之聖王魏乎建事策勲蓋天開隆平之路治人事天命世應期不得不然也逮夫中古豪傑之主唐文皇之討頡利漢高帝之賂冒頓措置愜當罔非偉績亦各斟酌時宜

廟算多得然嚴尤謂之無策未為通論乃是不知時勢而已竊惟陛下日昃焦勞江海梁益累年小康而中原尚梗強鄰堅敵侵掠憑陵日來事勢誠有間矣而未集也嗚呼洪水尚可治鬼方頡利骨頓之倫有為者豈難制哉陛下睿明今之禹高宗也成功何疑夫和愈於戰天下雖平忘戰則危聖德英猷何特漢唐可比其當戰也揆江山夷險之勢持重示弱養威待釁然後趁三捷之利保萬全而奮暫勞永逸貴謀賤戰以節制輯睦之

衆據險乘便決機取勝近日川陝順昌柘臯殄殲醜類
如舉鴻毛夫或驅除邊寇或致幣穹廬陛下卜之於天
命叅之以人事天誘戎箚之衷知難而退翕然更始厭
處中原思歸巢穴陛下此際熟複長慮合天下之耳目
而察之豈無最遠之見聞歷古今之成敗而推之豈無
最長之方略時攻而攻時賂而賂文皇之雪恥非難高
帝之大度何怯不廢兩塗隨事而慎用之戰而非窮武
拿禍豺狼之羣駛而遠遁賂而非偷安目前虧毳之性

薰然馴服深念夫興王要略豈不曰脩政令肅紀綱理財用洽恩信精士卒練將帥飭守禦七者益加宸心日新厥猷勵精勤勉敵必望風奪氣凶悖之心不生一意慕華朝廷聲實有以待之若不獲已以戰則克豈黷於兵彼既馴矣以賂則服奚狃於和大雅稱太王事混夷曰肆不殄厥愠亦不墮厥問混夷駢矣維其喙矣言敵困劇而卒服也臣竊謂深仁孝悌之感格英靈神武之變化長樂必歸侵地即復道勝德立息兵措刑何求而

不得何嚮而不濟耶臣賤遠愚陋不識時機今日鉅論
大議實非敢與區區事君之義冒死越職而言之欽惟
睿明裁擇取進止

務農劄子

臣聞王政之先務農為本觀周公幽風所陳后稷以來
田畯耜鋤斧戕蠶桑重穆滌場黃纁績褐想見先王愛
利厚生之敘慨然稼穡艱難小人之谷者思文之粒烝
民底于道矣古之治財者非一孔籠貨算緝運米歛積

甚勤且裕而周公所陳淵源深矣珠玉泉貨寒不可衣
飢不可食有補飢寒而至重者粟帛也二者不充則它
財無益蓋禾不天降非民力不生縑不地踴非民工不
成今陛下帑藏出于租稅每歲祿廩軍賓以百萬計五
年之蓄九年之備殆其可念自昔承平諸路之賦常不
能自給素所仰者東南數十郡今淮南往往為斥候之
郊罕復種植賦入惟恃二浙而已吳地海陵之倉天下
莫及稅稻再熟貢縣八蠶方今縑綺之美不下齊魯又

增以鹹鋌籠榷之盛夫復何加白丁工女終身絲穀伍
符尺籍盡力邊疆行陣者無暇播稽南畝者甘心餉饋
二者互相養衡田夫必億兆於甲士犁牛必百倍於戰
馬而後濟矣嗚呼孰與溫飽天下而富強邦國非農也
哉四民之最苦辛三務之最勞劇苟寬裕其生生之業
則士商工及末務者亦不匱矣臣竊惟先聖有敦本興
王之要道田里之安恃賢守令亦不必其躬行阡陌以
為勸課惟科歛正辭惻怛務實使民養生送死無憾人

心悅則陰陽和陰陽和而天地平於是風雨時若耕織咸遂殆其庶矣太公言寬民之目曰利之而勿害成之而勿敗生之而勿殺與之而勿奪樂之而勿苦喜之而勿怒夫如是地無遺利家有羨餘縣官豈在加賦侵牟而後足用閭閻困乏則邦本不固矣姑令有司量入為出出納之間不失欽慎歲計時辨裁抑浮冗累歲均省必致京坻之豐山嶽之儲帶甲百萬陳錫周洽籠實盈溢民有蓄藏穀纁雖鉅萬不以為家貲數雖公私咸有

九年之積可也禮義益敦風化益厚矣陛下待遇守令
賞罰以其勤惰於民才否必由民之謗譽誰敢不盡力
哉嘗聞漢人推行鹽鐵條目之說至數十萬言亦是裨
益邦家之術臣謂習讀詩書敦本而未茂矣儒家仁富
與霸道固異也臣不勝區區越職昧死以聞伏惟聖明
裁擇取進止

時務劄子

恭惟慮休戚之大究時用之宜情有所不堪功有所難

成不曰如之何殆將無以為今夫崇聖道稽經旨固已
立治本矣意者文昭而武未允志廣而謀未竭天下之
公患也考之往謀惟借漢可以為諭高祖起布衣器度
遠大非若諸生規規誦詩書也又蕭張佐之濟其不逮
履至危拔至艱莫不曲當故先得秦鹿如約當王項羽
號百萬衆盛怒將攻之當時衆寡相絕詬忿亦人所不
堪子房導之謝咎自解酇侯諫以湯武訛伸乃為頑冒
椎鈍忘小恚而得大勇羽莫能測也及其築壇以拜淮

陰乃定東嚮之計併率五侯之銳以討羽懷王君也羽
又弑之然漢義師嘗不得志屢居項氏掌握之中每以
智算折而不屈王陵領兵迓太公而楚距絕之漢復失
軍於睢水羽遂止太公呂后高祖自此裁一遇楚小捷
京索即堅壘深塹不復出矣成臯脩武之間惟務逃楚
以親在其軍故然耶君父之讐但分遣淮陰等數將焚
儲奪地高祖未嘗躬與羽角意有在也所以貴智而鄙
力隨何片言而下九江曲逆萬鎰以間亞父厥後四方

歸漢人心翕若羽雖剽悍失援寡助韓彭力攻之遂有鴻溝之割侯生緩頰而太公等果歸矣時謂高祖天授非人謀殆不然焉書曰必有忍其乃有濟隱忍之謂也方西伯居羑里七年閟天以寶貨奇物獻紂而後得釋故詩稱周之克商成王業曰夙夜基命宥密於緝熙殫厥心肆其靖之文武之荅天命未嘗求之未嘗舍之能忍宥也能謀密也及其和洽而光明盡其心矣三代聖王所以肇基王迹必養銳畏天以漸制敵人故集大勲

焉漢垓下成擒太公亟歸君父之讎遂雪漢之籌畫當
矣闇合於詩書也嗚呼朝廷行大道隆名教漢祖所不
及至於隱忍而知天命卑遜而終不屈比方三王與漢
祖皆一致耳然今日所欲未悉諧允如先王者誠文教
有餘師律未甚競也使授鉞非韓彭則敵無所忌衡命
非陳酈侯隨則請求何獲要當精推將臣慎行人之選
不愛金幣以結五利廟堂計慮彌綸坐以待旦肅張功
名垂成矣若夫留意揀求天下廉恥必勝之將則強寇

破膽今世知兵者豈無遺才乎昨者戎心稍馴貪我賜
予不恃戰爭戰之賂之相時而動不可偏徇此漢高取
太公之策闕天出文王之術也執事者宜熟思之

初論經解劄子

臣聞聖經賢傳唐虞三代所遺關里之業王者樂道尊
儒內自九重化流寰海金華露門谷訪紬繹辟雍東觀
羣能感奮俾天下品類回心嚮正政孚教洽三代之盛
漢唐之隆及吾祖宗聖功休烈六籍之效著矣鴻惟陛下

下生而知之孳孳舜善聽朝之隙橫經疇谷宵旰睿覽
研幾簡編建立太學首善之始崇道辯惑渥恩養士臣
等遭際作興帶經負笈陶沐亭育紳笏周行峩弁就列
跂望眸穆之儀而又昧死輪對軒陛當得言之秋非有
消塵稱塞右文以謂不足以為士矣竊聞永平之歲期
門羽林肄習名教貞觀之盛屯營飛騎受書博士臣固
驚下亦知竦慕狂斐儻說不揆其愚昔者仲尼刪定繫
彖筆削問周史聞齊韶而詩書易禮樂春秋各得其所

惟舉要發端不詳其言非不能詳也以為詳之則隘故略之使仁智者自求而得逮夫李斯滅學之後出于屋壁既非全經兩漢顓門之流白首講貫授受相傳深不負仲尼之旨虎觀石渠掘衣重席論難紛紜開益後人多矣唐文皇時初詔顏師古考究章程孔頴達撰定義疏遂為天下定論此兩漢魏晉以來千載儒術也夫六經微言妙用非可易解而遽曉始學必由傳疏近歲兵火典籍殘缺比日諸州刊印稍備今之諸生所以窮經

捨正義傳注則懵然矣此非一代之所私一家之偏說
一夫之獨智輯合淘汰千載宇宙之公是非也但漢初
儒者各讒諭師習詩書春秋古文初不甚行公穀方熾
左氏廢綱故三代遺典乖戾不合唐人因舊承疑去取
粗當未暇大有發明易數樂律至今不得其傳臣願陛下
特詔名儒學官既蓄聚唐之義疏復收錄近世儒臣
以學顯者所著講解申敕州縣委自守貳綱羅募輯刊
刻抄錄儲之太學臣嘗思念本朝祖宗以來名世豪傑

之士體道彌切經藝疏解愈明知先儒有未悟者條目甚夥本朝之學光矣非累聖神化不能然也意者商較評品假以歲年加秩給費纂而成編古人有集傳集解之號補唐之正義闕遺凡說皆通則並存之疑者闕之不妄鑿焉庶幾孔氏之舊祖宗右文實賴陛下為之統紀甚盛舉也其於設科取士考信萬方究析道真扶翊名教使天下後世滌耳剗目伏膺不忒實文治之偉蹟也臣不勝犬馬昧死越職上言取進止

論收用武略之士劄子

臣恭惟陛下仁聖慈武駕馭積賢之符天人顯相故能服強敵安土宇四方乂寧右文興化士生斯辰操觚挾翰者罔不競勸咸以無文為恥步趨先後圓冠方履溢于中外丕平極治禮樂具備寢隆盛矣臣愚竊見近世干戈之際武力常恨不振今雖平康豈遽弛焉恭惟本朝藝祖之武太宗之文列聖重其光所課試區別盡天下之才致太平防患難文武二柄未嘗偏用天生五材

關一不可書曰帝德廣運乃武乃文今之識擢武士不若用文士之易天下之事莫難於用兵中國文明冠帶之俗士嫺習於辭藝不足者武也盜賊蠻獠之警何日無之今三府有按瑣之吏外臺有饋運之臣皆所以振兵也英奇鴻果倜儻厭難之才或不肯由場屋誠別有以籠罩之亦多塗矣古人有言曰物有不求未有無物之歲士有不用未有無士之時萬一江海飄淪往而弗返異域之人尚或招來之以為我用況在吾邦者哉凡

修政當修之於可修之時今國家閒暇理宜致意一旦
倉猝乃求恐非備豫之策也昔漢高帝摠攬天下英傑
而歎曰安得猛士兮守四方此蓋帝王之度不得不然
登壇受鉞非太平事旌擢觀省儲蓄優遇亦欲補夫戎
閫獸符乘障被羽之任也今之宿將例各休老後輩威
名著者幾人勇智可用之輩偶至失於甄錄或沉埋軍
中嫉於驕將或汨於賤遠無以自達或觸犯文法武人
常理寬之以容索之以出養之而成其可已耶夫斯民

豢於太平之樂游娛飲博心志恬嬉軍中投石超距之氣索矣可無猛烈之士倡率之哉膏粱華屋之性習至若衝霜雪冒炎埃飢渴驅馳趨死不悔惟山澤辛苦之士有以為焉萬夫之望殆此者也今之軍伍既無出戰捕盜可賞科舉粗收策略弓馬之名此外莫若明詔在朝公卿與戎帥統督監司歲薦所知武勇傑出之人朝廷置籍甄品時加召擢絕出倫類如祖宗時郭進李漢超削平之後曹瑋李允則种世衡之流竒略高才不易

得矣古人未能遠過也書曰載采采歷言其事狀也詩曰南有嘉魚烝然罩罩言勤取之必獲也庶幾復得如此之流守邊臨敵永不乏人臣無任私憂過計拳拳越職上言取進止

論取士專優春秋三傳劄子

臣昧死恭惟本朝以詩賦經義造士庶幾虞書颺言之舉於斯得人祖宗朝甚盛邇日海內諸生窮計聖籍該洽道藝義疏名家羣士慕嚮固不遵周孔之軌躅纂闕

里之旨趣易詩書及二禮先王謨猷貫穿詳備課有厥程惟春秋一經前此廢絕不用陛下稽古睿明注意經傳致令學者討倣脩習今既舉行二百四十二年文字五家浩博以其久遭擯棄其說孤寂罕為人所講授僅有治者終恐蕪翳有識之士嗟咨歎息此書筆削乃文王之文褒貶則周公之法禮義大宗百王通典考周之所以王有邦家者守經事而欲知其宜更變禮而欲知其權是非勸戒係天下表儀繩準別嫌疑定猶與至斷

妙用世所希聞傳業者優柔浸漬積久轉解實不易領
會也古之君子窮此學白首不輟惟經之體要固天下
國家本務丘明授經仲尼厥為附傳非私意也前代稱
左氏古學所載紬繹三代禮樂上紀犧炎唐虞禹湯周
孔遺軼齊晉伯主尊獎王室捨此何據焉又公穀二儒
傳經子夏二傳乃孔徒遺旨典則非後世所及西漢賈
誼賈嘉相與纂繼此道光武中興立左氏博士唐文皇
早歲受麟經之誼晉代杜預宗趣淵源大賢所業夫治

春秋之學如賈及杜皆名世偉人臣願陛下明詔中外
有司場屋詩賦策論命題措意或用春秋三傳禮闈取
人特優此孔經分數不妨以聲律定去留東求精悉傑
俊知類通達者置在博學師儒之列如誼預才謨飛聲
邁烈未必乏其人也俾瑣瑣懵學雖欲夸世亦不斥而
自屏矣臣愚烏足以究其閟粵極其高堅不勝懇懇披
寫之誠所有越職不敢逃罪取進止

應詔議福建路盜賊

籀伏覩正月二十五日詔書節文本路帥守監司各令
具所以安輯綏撫消弭盜賊便民利物之事者籀竊伏
詳味聖意憂愍元元省刑薄歛視之如傷待遇僻遠一
如輦轂此堯舜之德度中興之基址臣下並體此意羣
寇竦聞德音寧有不懷消盜安民無以易此也籀竊惟
致盜之由與治盜之術又有愚誠在朝廷莫若選賢能
守令任擊斷使者在州郡當寬其文法重其事權方今
盜賊如本路近日三十餘火大者一萬小者數千百人

姦民恃亂以為富貴之資非但失業乏食者也驅擁謹
騰椎埋焚劫所在之處官私一空人不聊生鼠輩恣睢
謂莫已敵是可忍也孰不可忍也子太叔有言政寬則
民慢慢則糾之以猛猛則民殘殘則濟之以寬太叔以
其說治鄭之羣盜若吹鴻毛耳方今天下多事而郡邑
惟務姑息祇畏朽索蒲鞭寬待強狡之屬文吏自愛不
任桴革之事爪牙鈍束之職無不曠弛致使州兵縣卒
飽嬉游惰騎而難使軍政無紀師律不行一夫被甲行

二百里而耗庫錢不下十一二千故重於遣兵布衣氓
隸圍視而窺國家之隙誘誑南畝一旦成市蓋賊自寡
少而嘯聚官司覺舉不可少緩萌蘖易興滋蔓難圖故
平居無寇亦當謹鄰保之法嚴警察之備盜若糾集豈
容不知及勢孤力劣爪牙缺短之際不煩大兵亦可擒
制此事今已無及賊黨已熾郡邑兵少回遑之不暇專
務餌之以錢帛縻之以官爵一切不問以安反側或能
以方略使之摧敗或能以反間使相殘併盜必少弭捨

此不務與之官惟恐不高給之錢惟恐不厚舍垢忍詬
莫敢擒捕僥倖既開小人嗜利倣効者衆今日此鄉賊
發明日某村又告急矣譬如養癰長疽厭弃篋艾坐視
胷背之潰者也至有已受招安恩命亦不肯投戈散羣
小失其意則奮臂倍約破壞縣鎮掠千百室大阿在手
無不可者東漢李傕唐朱克融以不赦而成大亂故以
招安為務然賊方蟠據招之往往不聽非能使之摧敗
詎肯歸我乎漢時所以置繡衣直指用干戈斧鉞豈不

仁哉不得已也開其自新之門不得不寬禦其不悛之心不得不猛無辜之民脅從叛援若夫訓導柔輯施其乏用扶其疲弱復其常產此所以待良民之不幸者也若夫招之而不歸懷之而不伏此頑民不可恕者也節制將士裁節冗費振起驕惰賞重罰明借俸侯王以充其費緩急之際州郡兵將相與戮力亦不煩朝廷顧憂慮勝而戰用惟其人殲厥渠魁分其徒黨願為軍者撥隸諸營其勇力易以使遇它盜發則以既降擊未伏皆

良策也至於守邦之人陟廉黜濫選如龔遂者以收安
靜之功若夫豺狼塞路以力戰邀我選如王尊虞詡文
武之才並假之以便宜勿拘之以常法如此朝廷必無
盜賊之顧憂安民利物誠在此耳籀不勝區區冒昧陳
聞

雙溪集卷九

欽定四庫全書

雙溪集卷十

宋 蘇籀 撰

雜著

媿風一首

治理之要任人舉事則天下治矣其功在勉之而已天下之不治也譬如人病之必醫苗莠之必除塞當世之責副萬民之望所寤寐而求者曰致君中興芟夷凶穢人或曰彼能之安知其非才且傑乎又安知其非狂且

妄乎蓋論議美矣事實必驗聽而試之可也將使彼竭才力蹈荆棘為吾用所係休戚甚大而其能否殊未可見誘唱鼓作之惟其勇也待遇試審之惟其詳也以其人之難知功之難就也一切廢絕間有一二有志者皆指為生事目為妄作厭惡而斥譴之是唱天下之媿風也媿者淺浮懦薄苟且委靡之謂也小臣媿則惰其一職大臣媿則敗其萬幾昔之君子尊周室和戎狄禦大患災興復宗社雖赴湯蹈火而不顧故虛心折節褰裳

忘餐以取智勇之士延劇孟拜尹逢常患其晚至於忌壯士以資敵國抑高才而沉下位未有不為悔悟者也妄作之人亦何足患吾為國家大計遠慮任此人舉此事閔閔焉如農夫之望歲其黜陟以公議狂妄者聞風引去矣何至於因噎廢食忌天下之狙詐而不敢使絕天下之謀策而惟自用揜耳目絆手足政事垢訛曰適然耳國勢倒懸曰時未可也則安用彼相乎夫懶者似靜怯者似慎用懶怯之徒持靜慎之說將使一國之士

苟容求全守常即安退縮護惜拘攣苟繞隨羣逐隊一呼再諾而坐俟衰壞朝不及夕耳妬媢者進庸猥者奮有能有為者相率而去我矣昔春秋晉趙武魯孟孝伯語偷穆叔知其將死以其媢也晉庚道季懷廉簡于千載且曰曹蜍李志雖在氣象奄奄如九泉下人人皆如此便可結繩而理但恐狐狸猶貉噉盡夫氣象奄奄此媢之狀也其肯以休戚自任哉夫君子自致不可隘隘則不能以天下為度自待不可卑卑則不能高一時之

算自守不可狹狹則不能兼一世之智蓋以為忍歲月
之勞而除千載之患豈徒然者耶以其痛心切齒於既
往不得不抱永嘗贍於茲辰必也勉旃孜孜提挈左右
收衆才兼羣策諮詢延納日邁月征而後渝風息矣今
有人臨危而不愛身任職而不遺力不幸無成而朝廷
不恕焉厚其罰而不錄其寸長是不如全軀而保妻子
之策為優也天下以不幸無成者為戒相與靡然日趨
於燕安自珍愛而已此豈不為風俗之大患乎昔堯之

治世用鯀而後得禹故洪水之患息燕昭之致理延郭
隗而樂毅來故齊可破夫取其似者而其真者庶幾可
致也似者尚厭之真者豈肯至乎故一切不任人舉事
唱天下之媿風誠衰亂之原也不可不誠也

民情

傳曰人情者聖王之田也蓋治國治軍無出此焉天下
舉皆欲之而我違焉其誰附我我既同天下之欲以取
天下其豪傑智略收之不盡則亦得其梗槩而失其樞

要矣不可不察也所謂情者原之熟複採之廣博而後
曉然也知天下之情則有以處之矣情有不問而易見
者自神州陷覆郡縣塗炭元元被禍不勝其酷懷宗社
之恥悼骨肉之喪苦之思樂憤之思雪切齒搘腕宣待
問而知宜待令而勸耶豈非其梗槩如此乎神策廟算
必將日夜憂人之憂事人之事因其藏怒蓄憾而用之
其勢百倍其心欣然其有才有伎者爭自效矣所謂易
見者也其深而難見者天下智士謀夫各有所蘊珍其

貨而未售膠其口而未啓彼知其十我知其一彼知其大我知其小靖難機便之數成敗精微之圖得其說則安失之則危豈非其樞要乎其可忽略也哉故夫宵衣旰食疚心焦思無退托苟且之失拯溺救焚示天下以有能為皆所以急民欲也盡其心慮之必預諮諸人計之安出施設忖度視未萌聽無聲如是而攻如是而戰雖庶人至陋當與謀也補袞作礪之臣使能辦之亦不廢周訪也智容有未盡見容有未徹而謂天下無人可

乎竒略遠圖初固茫昧宮闈廟堂窅然高邃故開誘百
端虛衷延納盡一己之耳目心識合天下之耳目心識
率天下摠羣策而已矣善治四海者不出戶牖而隱奧
幽遠無所不知豈特運智見之博乎既有同心同德之
佐又善待盡忠納諫之士稽之於典籍究之於心術質
之於蓍龜而切切焉勞謙接下三省十思既決其策斷
而行之高爵厚賚所以賞進謀者也督責黜罰所以貶
無謀者也不搖於二三之說不奪於淺促之見則所嚮

諧所欲從得情由道故也情之所在無貴賤郊塵默涅
之間也無夷貊盜賊仇怨之忌也內則在廷百執事無
餘論外則漁釣版築無隱藏國是與衆情叶符一號一
令沛然如降時雨一取一捨翕然如拱北辰野無遺賢
舉無失策矣自古撥亂而風驅電掃者得民也衰世而
基屬牢固者素結人心也昔漢高帝以仁取天下恩育
秦民故也謀臣滿朝可謂至矣尚孜孜焉訪於側微故
於平九江則假隋何之辯問薛公之策都關中則納奉

春之計一不用則困于平城曹參賢相也治道出于蓋
公淮陰真將軍也而師事亡趙李左車蓋天下之謀知
所以求之則進不知所以求之則逝矣仲尼不恥下問
書曰好問則裕自用則小豈不然乎嗟夫今之長國家
者器度足以包之膂力足以舉之膽決足以任之以開
濟為心興衰為意民心固宜輯焉至於天下之理勢願
以天下觀之無拒逆耳無厭多算無執偏見使有作有
為者畢效於前英傑者不容緘默獎王室拔神州可以

無悔而有裕矣庶無負於具瞻也

進取

國步未廓阻江保淮鑾旗親駐西嚮中原天下有志之士宜日夜焦思苦心求所以制勝克敵之策以助朝廷大槩預怯者膠於守其為計安佚而易從預勇者銳於攻其為計艱苦而難辦嗟夫智者謀之才者行之以集事為優矣若厭事以循默愛身以避難苦其艱而不為巧言自解俾躬處休則何貴於忠智哉古之豪傑任天

下之憂患皆奮然以身當之傳曰狂者進取好謀立功
則非狂矣古人未嘗不落落於其初也昔者三國鼎峙
魏武在鄴仲謀之強終身不敢北討魏文帝雖無足道
司馬懿將其師孔明以十倍之才歲歲馳驅亦不能成
大勲至於姚泓慕容超庸瑣竊號宋武取之不再駕歷
代攻守之說可指數矣大底江左明君賢輔誰不曰拓
舊土攘戎狄寤寐食息未嘗不欲進取也以怯而重敵
戰何以克以勇而吞敵所尚者計策也自負其才十五

六而覬於取矣夫不盡用兵之害則不得用兵之利審勢之安危量力之堪藉惟其至明焉議者曰方今天下復平南北渾一之時也吾君勵精圖慮良算之多致勝千萬且我師日益我馬日多粟帛金錢惟優將士不患賞之薄矣愚聞之周宣王漢世祖興復僭亂若返掌之易者當其時中原無甚堅敵天下涵泳其祖宗之澤至深也今之與我為堅敵者在燕雲以北設使爭權而來不過一戰再戰知難而退矣三戰不屈而舊境可復也

青徐汴雒雍并之間我之所爭偽齊小醜也觀其舉措
有割據之粗其抗拒我者恃救援藉聲形以吾累歲降
攻討之詔出擣虛之兵然實亦固壘練士有此名而無
此事師不出境遷延退縮劉豫不度吾之強弱謂吾不
能戰去冬悉兵犯順吾邊吏擊之如振落拉枯金人未
暇救之也夫金人生長于北方者也其勢不能久處中
原況江左非其所欲爭願得吾地者豫也其理在於不
可貸我涉江取吾故地兵力粗能抗拒則豫不勞攻也

使金人果能據中原也暴骨而得之何不固居之破都
屠邑弃而委之偽豫豈復顧戀於吾地哉以盜賊之雄
塗炭椎埋驅逼刦質此亦是無住民心憤懣切匪風
之思彼亦知地土人民非已有矣又其性樂冬便寒炎
暑癘疫之候人馬死者無算其俗畜牧騎射往來轉徙
逐善水草非可處于棟宇窗闌之下也彼亦見其兵士
之賜死矣何敢居吾宇也狃其百勝積威之後負燕孤
冀馬不憚遠征謂我不足慮者見我降攻討之詔以為

但先聲而已近歲絕不侵我邊境自川襄皆然以其所得之厚為自全計非有統御南北長久之道也金之強兵銳旅雖多偽齊安能役使之金政以賄成貪婪無執豫斂億萬之賦買其竊號歲增重幣剝膚椎髓未嘗恤也金所以必救者實由此也但恐其援助偽國與我戰時非若其自衛夷落之戮力致死耳戍兵亦疲病久去穹廬矣勉強驅率雜以漢奚非其精者也我師北出謀帥如王景略者一人俾其自選副貳參佐以次而勿用

不嫻戎務者又簡任一二人善治國如夷吾狐偃者使與勁兵賢將一半居守昔勾踐使種蠡分治內外此東南舊躅也內外之備既設進者無郤顧之慮金不過以騎兵邀遮我於平陸當求便利先勝而後與之戰假令偽齊倚金重兵相為脣齒豫借倩它人之力進退周旋金自為謀屯駐豈能久也我師孤軍當說豪傑以為助助多而力強則軍不孤矣金知難亦將避我則偽主成獨夫偽衆皆怠弛矣疇昔諸將與賊爭鋒者或欲橫行

沙朔犁其王庭臨滸海略躡林此誠不易矣漢唐名將尚優為之方今之計收斂毳不耕之地撫荒裔不恤之民戎索視吾黔首如草芥然顧郡國如聚塊積薪然豈復固拒必爭耶傳曰天予不取反受其咎向者天以中原資金人而金人判然去之徒使土龍芻狗竊號假威焉殆天意人心其將復以授吾宋也朝廷枕戈寢甲忍詬蓄憤十祀于茲二聖之恥未雪百世之責未塞謂金方強嗚呼使金割據如石勒魏太武當且以中國委之

今金人無居於中國之理徒使小醜滔天何可置也王師乘便既為守計又為行具水陸戒期數道並攻連艤濟江救民於水火之中舊邦豪傑謳吟望思革面倒戈關河響動撫我封略取豫係之長纓戮之藁街擒金人之為偽守者陳其俘馘告于太廟所以副吾君孝悌之至而出萬方於塗炭也愚嘗論取齊之期無然太速無然太緩乘百下百全之勢輕銳先驅而重兵繼後量力所及匿形持重不求小利不貪近功一旦據官渡杜孟

津金衆何足深畏哉猖狂薄我破之必矣雖然豫亡金
破之後豫雖灰滅而金猶山立我師能帥中原豪傑併
威合勢與金力戰數合而不折乎當此尚須必勝之將
也故曰攻之計艱危難辨豈非以此乎嗟夫今日是聖
賢馳騖之時豈在乎硜硜之士哉雖然舉弃之則過矣
事濟則小夫為鉅人矣

論將

天下之事莫難於用兵職柄之專莫雄於為將先王興

戎撥亂必求天下驍雄之魁焉不可失也得其魁築齋壇鑿凶門而出禁暴除害賴其英威然視所以觀厥由保其終於用命乎權任久大豈易收哉亦在善馭而已其初必精察其趣嚮否臧幾變成敗因以定其委寄重輕表裏指蹤監貳之敘制勝千里況目前之能不乎為計百年況他日之事宜乎不容於濫且繆矣既無致敗招侮之由姦雄無間隙可乘故害人之心已焉世厭常才之寢劣乃若非常之才豈必馴謹恭愿之士往往跡

施猾賊之倫取其沉鷙多略其細行譬如乘馬無取於
駕筋下駟汗血之駒騰山飛塹王良造父手其轡銜控
抑而撙節之則燕越容與而至不然顛墜蹠齧之是懼
矣請借漢以喻之昔高帝以一劍之任削平四海得將
將之術焉先挽奇傑精識之士以為腹心耳目揣摩操
攬擢淮陰于爪牙諸將如百鷺之遇一鶴能用其鋒世
無強敵此天下之大計也高帝曉然知信足以制項氏
而一六合者也於是推以赤心專任篤信大封重賞至

無復加評其為人審矣一時之事舉無遺籌異日之虞或有不肖之心素蓄預圖萬全之策固已辦之於未萌矣蓋竭其才力制其死命帝與謀臣蕭張陳舉目躡足無不該也信并秦滅楚在於掌握至討陳餘逐田橫輩獵狐兔然惟帝以術籠罩信故遂為漢用不肯負違也蕭陳諸公制其死生有餘大抵瞻前而忘却顧見利而弗思患覩面而罔相背論貌而不忖心知縱而不知擒何足以權大事乎高帝興王四百餘祀知人任使之當

此其最大者也又其次恩分兼濟以駕馭彭英盧吳列
爵數級以酬靳灌噲傳預期周勃王陵等異日之所為
謂柏直馮欽項它皆非諸將之敵冒頓攻圍韓王信賜
書示之死生安危存亡之地以責其懷貳譬如用藥正
中其病也此在信為良圖當奮匈奴死中求生耳其叛
疽醢之計也考其權勢節制區別揣摩人不能欺洞見
曖昧天下孰不為其用況麾下之諸將乎上至鷹揚之
帥下至翹關負重之能馭之之理帝盡其道矣其後文

帝賢周亞夫之治軍屈已以伸其威諉于景帝卒平吳楚之亂至於武帝赦李廣之專殺以誘進猛士大得其效數楊僕之五過以振起其驕惰遂平南越此皆有父祖之英槩矣夫成大功必天下人豪使之而不通其方違彼才失彼志此但能為患何功之有焉漢之事可覩矣漢之後司馬文王伐鍾會之勇以伐蜀知會心術難保密圖制其變既而會果下蜀雖欲為亂而衛瓘正之亦無深害齊神武平生任侯景得其死力身沒之後恐

景不能事嗣子世宗預圖所以制之謂莫如慕容紹宗
世宗用其計景雖作慝而紹宗追敗之梁武帝納景之
降坑寇而不防患梁遂以亡使司馬文王棄鍾會擯衛
瓘則蜀何時可取使齊神武不察侯景昧於慕容紹宗
則景之禍在齊而在梁矣夫用竒能絕略以禦強敵
彼誠如趙充國郭子儀德度脩飾固天下之福然千百
一二也夫人君待君子長者何難誠無術亦可也假若
淮陰輩苟無履霜之慮將貽噬臍之悔矣方今以戰止

戰用武之時將率之徒不可謂不多矣任責大者平居
習銳蓄勇鞠撫士卒賴其治戎緩急提鼓抗旌倡率師
律司命吾人安危注意于此烏可不慮不思哉歷代明
主賢相朝念夕惕任使將帥所以研覈窺較斟酌擾馴
至熟至詳竭彼所能赴敵死綏無不授命何敢有悖心
哉蓋舉動當則姦人帖妥無以藉口佐貳賢則蘖牙其
間逆節不行恩威肅則渾然悅服無從為非形勢安則
兇黨孤單不敢妄動如是制馭則善矣才宏者可使之

不敢驕任重者可使之不致疑功成事遂朝廷安枕而無憂至於異日無失策焉誠由其道故也屬者山林亡命閭閻博徒誤廁軍籍積勞饕位瞋目怙氣不遵法律恃金帛充饜之資狃擊刺射御之伎故態不悛怯公戰而勇從亂所乏者絕衆之智識也少弛制勒肆圖不軌潰叛返噬莫之誰何嗚呼馭將之理豈如此無效乎此小將也主帥制之必有策矣使復有才大者所係愈大鑒古而制今可也

刑禮

僕竊考自古聖王治要必隆於禮而矜於刑舜用伯夷
秩宗伯夷降典折民惟刑禮之所去刑之所取二事兼
官聖人所以化服天下奉遵典常治七情修十義俾人
嚮方循理訓喻之本三代以降見於六經諸子先儒之
說皆此道也古今諸作者因革既已該備書稱舜之五
品固不由茲僕鯁生蕞爾然其說所係者大欽念而篤
論之國家法令詳具僚吏以誦習持守為任職拱手而

遵行之勅令至於繁碎律之外科條數萬立法者日增而不已警策繩糾恃此以為至矣千歧萬緒殆無以加焉古之知法者以省刑為本今之知法者以不失有罪抑末矣先王要在人法兼用故曰律設大法春秋鄭子產鑄刑書自謂以救世晉叔向非之曰先生議事以制不為刑辟將俾亂獄滋豐賄賂並行民將不懷鄭其敗乎自唐以前治罪科條止今律令緣人所犯適變無窮若情見迹具詞伏理盡不在巧詆若患綱之疎而加之

密至於苛刻非仁民之旨趣也患罰之不衷而裁酌之
斲於便事多立收坐遂至於滋彰在夫清直之卿慈怛
之師明慎較量焉故曰任人任法兩者闕一不可夫視
表裏決嫌疑非大人長者處仁達理者不能詰姦軌敗
常非辯智精覈者不能人法兼用美矣伯夷遠矣豈乏
賢者而任之乎呂刑曰德威惟畏德明惟明所賴率德
之卿士也仲尼曰道之以德齊之以禮有恥且格晏嬰
曰禮與天地並是以先王尚之太史公曰禮禁未然之

前法施已行之後法之所為用者易見禮之所為禁者
難知其旨意豈務苛法也哉方今稽古重事郊宗明堂
檀弓以至于曲禮內則之屬乎故切密罰責不若孜
孜脩義訓執持儒典該而明之折衷古今繙絕時變參
用適宜可以指喻萬彙約束風俗以俎豆代狴犴必將
使天下起居飲食習其耳目和其志氣周旋威容之間
畏而不忍瀆忌而不敢違溫良欽順恪莊遜裕所謂禁
未然之前也名檢不可揉化者有司罪眚無逃焉刑實

非本務也恭惟徽宗皇帝嘗勑修五禮新儀與舜所修同歸于治今宜因舊書之目在朝儒服之士擇三五人篤於窮理者加之緝熙稽論擢道尊學富士流推予者提領之寬假年歲之限刊定軌儀歸于適道周浹審固成書鏤版內外凡百有司隨事所行隨宜頒降俾家有其書人究其說禁其為非條其從是奉行繩檢至織至悉督謹未加避就判然所欣慕者名教也不傷朝廷有司和氣如此施設遂正風俗圜冠方履者必視效矣誰

敢逾之戴鶡服戎者亦有遵行訓以警之如此朝廷必
富于守道執德之士間閣必富有端慤馴行之民由是
思之多辟可措不貴網罟繁悉示之恭肅撙節原本既
立防範既具末法亟勉太息不得已而後舉矣謹昧死
出位言之

鑒裁

遵人理之常處世不過親姻之陪游師友之事契然後
識其器望詳其本末如此耳目所及亦狹隘矣或者當

天下之重任負憂責之危機挾用人之利柄瑩澈清鑒
坐觀列位柰何默默循循乎哉人之難知江海不足以
喻其深山谷不足以紀其險浮雲不足以盡其變至於
有人則作之無人則輒之蹠乎蒙霧而罔測夷跖優劣
端的殊不易分也昔白公勝有勇楚令尹子西使舍於
邊境而衛藩焉葉公曰勝好復言而求死士殆有私乎
子必悔之厥後勝憤嫉楚執政因獻戎捷作亂遂殺子
西書稱臯陶論知人遂陳九德意在於立擇士之法也

莊子九候之驗大小之才從可觀矣若鮑叔之於管仲
蕭何之於淮陰盡言極力而薦之果能係一世休戚此
非尋常之立賢也鮑蕭可謂精識奇偉之傑矣嗟乎它
年異時功名富貴之事赫然千古之名炳然確然辨之
何其蚤也竒則竒矣由此觀之舉善去惡進賢退不肖
循常者陞黜必精覈耳上古臯陶春秋葉公漢之蕭相
談者不置也近世承平亦有其人焉廟堂以臯陶為師
流品昭著因以選任士有素定之價優劣先具度德稱

位愚昧不才亦無所容矣惟雅達聰哲之君子則能用學尚英特之士勢之必至者也前輩之舉有不減古人者昔副樞錢若水識祥符王文正公真宰相器啟於章聖皇帝以致大用文正公因觀奏議知老呂申公謂叅政李公廸曰此人它日與公對秉鈞軸此非常之獨見也王文正室家外舅趙叅政昌言蚤歲將漕湖外知李公沆台輔之量以女尚文正許其遠大文正當軸所薦可為大臣者十餘人皆登爰立不為相者二人凌策李

及皆為名臣諸公藻鑒人倫拔乎其萃如此王公門人
則楊文公大年此公一見士類品評其賢能爵位壽夭
無不立斷見於歸田錄世所共悉古今之鑒裁可謂世
不乏其人矣前輩去古人何遠小生故感慨而言之長
國家者博舉慎擇不可忽也東漢范曄著郭有道傳曰
好事者附益增張華詞不經類卜相之書嗟夫人實難
知挾術者亦勿深鄙加以道理揣摩之百舉百全矣

任將

御天下弗可忘外虞謂其戰克守固計然曰知鬪則修備厚賂戰士遂報強敵蓋殄寇權機受脹摧鋒虎臣之儲邊隅之警豈不急乎效一官守文法處平世此士易得也奉承廟略奮鉞鞠旅建號尚功威不若康不乂鼓旛之教司命王師用才之日長國家者務在傾心注意而省錄旌褒也其視脆怯狂驕者為如何原夫吐哺走迎者誰委倚待用者誰眇然奚不素具乎且以貌取之龍唇豹頸姿體雄異此許負姑布子卿之目可鑒也憲

度自有常規揭旗翹關之流至於奪鐵槧扛大鼎姑謂一至之能偏稟之性驍勇絕羣語識未見非可以叢雜倫伍齊齒庸流區別付受必有所宜矣要不可湮曖於時必享豐腴而衍厚饋去卑奧而升冠軍其或為人嗤多言矜慢使氣悍狠不羈龐中貪鄙方將使之亦小恕之凡欲毗倚較厥聲實而已經濟念亂遠慮長駕之君子身雖不進以武毅佐時拯世鶻冠之雄何可忽也求焉而善視之屬焉而聽信之志士達者宏議遠紹盡

知古今始悟此術也凡論將帥威烈忠智勲著盟府行應規繩必以唐汾陽西平二公為準的此至論也器人於提軍帥師窺人之膽力術略挾雄俊之見稟驃姚之英有卓越超絕者其赳赳桓桓圖事揆策風稜紀律必非常也當樞軸者忖擬揣測審諦考覈養育候伺詳訪博採非一視而覩一叩而悉大槩致力搜討傾懷驗實忌於鬱塞拒蔽也疑者不使使者深信萬一天錫神武則哲之彥精能推擇又有駕馭常情固然明智者不須

摩勵而已得之常論取天下之才必擢其魁桀極天下
之選用盡其伎執詮品而定高價委任而責成績將帥
懷奇譖索敵情宜用孫武子五間昔秦患魏公子無忌
與諸侯合從攻逼函關求晉鄙客行金萬斤魏王果聽
讒廢黜公子漢患楚之范增倚陳平捐金四十萬斤而
項籍君臣解體漢伐趙上將軍求廣武君募賞亦千金
既而北面師事之坐降擄而聽其計遂脅燕定齊三者
皆因間之上策也漢高之於淮陰初由蕭何所薦前後

累歲又追亡至登壇開導甚苦蓋賢明卓絕之識高祖英偉詳味而東任之至俾斯人口陳其方略必勝必取之謨光武之聽耿弇使自道其施行舉動韓耿後無一語不讎者此俊傑大知而大受也可謂偉蹟矣宮之竒在虞晉獻不寐衛青居位淮南寢謀此有備防患者也陳湯名對屈指計烏孫之圍五日當解已而信然羊祜舉杜預自代奏王濬奇略二人竟平吳此所謂知人矣周亞夫堅壁以剗吳濞七國削平司馬懿與蜀爭強知

孔明才智籌算以不戰而屈其兵料敵有如此者趙充
國之湛審精切馮異之不伐其功段熲仁愛士卒在軍
不蓐寢者十餘載藺廉相下以濟國事朱然之臨急膽
定王猛之涵容鄧羌五代李存孝晉鞬髀槊身被重鎧
獨舞鐵撾辟易萬人近世劉昌祚與羌人遇以一矢斃
厥酋敵衆瓦解而遁凡選將臣歷試成效此例可究悉
也大凡分閫專征鑿門受律納忠責成託不御之權其
人性行謀略最為至要呂蒙陸遜是謂真賢周吳蕭摩

訶意突直前不必百全者也嗚呼天子操海內生殺之柄大臣任國家股肱心膂後患却顧曾以爪牙為篤念耶恪府庫之蓄不能用間敵情何由知休戚一時所係建立元帥部勒偏裨發謀効計軍士惟命酌其所為輸厥誠心俾之盡力蓋無競維人耳漢武數楊僕五過所以鋤其驕夸之慢心建武天子詔岑彭過家上冢朔望問太夫人起居所以深獎其戮力也高崇文討蜀杜黃裳從中指授以劉灝憚之謂曰不捷則以灝為代崇文

懼出死力縛劉闢以獻蜀賊削平周世宗不赦樊愛能
何徽諸人等退劙之愆張永德贊成之世宗擲枕而決
戮者頗衆非一一有不獲已也謂之得策嗚呼凶器危
事御世本用斯文先王慎重深戒尚武予聞之范公德
孺其人家世及身天下名帥范公言每讀號令誓書申
明軍法頂踵如被層冰論兵豈易言哉豈易言哉用唐
汾陽西平二王傳為標榜三代以還仁義之將夫復何
加乎

卷十
知人

竊覽古昔二帝三代理世興王至公至明用得其人則治定用非其人則危殆堯資元凱周任十亂書云在知人何其言之簡而當也人主有意於鴻圖究悉於前古深考夫言動主善嫉邪孜孜勉勉握提繩尺賞勸有章罰斥有敘近密顯昂搜索探討評品較量庶幾時人在廷黑白輕重有程能不鉅細不繆揆效酌能使衆人材各伸其所為君國子民者昕旦而起日昃而不食曰吾

今日為某事果濟乎其人果良乎如是察焉不退其心
欲興至治素立吾朝者凝丞輔弼必有忠義智謀之可
仗有鑒燭考慎之機要有諮詢訪問之毗益概乎庶矣
近臣未有忠實明澈之委倚遠臣如何可信憑愚竊謂
知人有敘自本以及末由上以及下自親以及疎此不
得不然也夫規先哲王之訓頌稽唐之典懷願治之意
典學無厭信而好之克己復禮以行其仁惻怛之實昭
感被之情著昔管仲對齊威節制其六柄而用之其目

生殺貧賤富貴凡此六者一人有慶揆道修法稽古知務純篤該明揣摩思慮而行之則操得其柄矣蓋柄實不易當也左右近密廊廟元老據上下僉言推為賢達德度誠副厥位故欲聽其獻替予奪也如此人君操柄易為力耳蓋知賢委任得失利害易致安平危殆隨應自本末上下相須以為之臧多否少朝廷措置不過由此此在主相堂陛之間股肱耳目各極其處畫也利益國家更欲何尚乎古人建言此道曰覈實審舉詳而求

之博訪研窮皆不可已夫計功論績辨偽取真古今推
子皮之取國僑鮑叔之知管仲皆素與交游備覩始終
探其志行閱其器宇守道藏用者可得而見沽名飾貌
者不容其詐蓋鑽其學窺其賢度其才質其行或非一
朝一夕之所能大概德厚者未必才周才盛者必建殊
勲無求備於一夫或採拾於衆言欲知治經治獄治財
治兵之任其間軌範百慮千端又或付一州一邑一官
考評斟酌至精至當揜選之間其大僚必智識高偉博

達所以吐哺握髮其操術豈不欲有其具乎世有異人
深稟絕智衆所不測者觀之尤難非常常之見瑣瑣之
智所能究悉也華歆表曰勵俗宣化莫先於表善班祿
敘爵莫美於顯能是以楚思子文之治復命其嗣漢室
江公之德用顯其世遂以鄭康成子小同爲五更其年
祀久遠清議素著此尚易見其所謂尤難者漢高祖以
天授絕人之智倚蕭何聽子房自謂不及信而重之數
年間登韓信大將壇又令子房封信齊王此非常之舉

措知人之甚大者也故曰尤難才敏如淮陰識如蕭張
明如漢祖所以誅戮項籍天下歸漢創業垂統髡髮湯
武皆由智慮睿哲也蓋人之不易知江海不足以喻其
深山谷不足以紀其險浮雲不足以盡其變有人則作
之無人則輒之雖盜跖為伯夷可也非常之傑超世之
雄有補於天下安危如韓信是也知人而不論其大者
不足為知人之難矣若夫不察不明唇塞聾瞽繼芻狗
而求盧鵠之功架雞鶩而責鷹揚之效薰蕕易位鹿馬

倒置茲咎敗灼灼古來必喪之邦也夫復何言乎

雙溪集卷十

欽定四庫全書

雙溪集卷十一

宋 蘇籀 撰

疏

天申聖節疏

千齡聖瑞運叶亨嘉四海樂推道隆康濟虔假三乘之妙鴻延萬壽之祺凡庶同詞普天善禱恭惟皇帝陛下乾健不息離明正中仁增益高施博彌溥受天之祿如川方興雪復神州綏靖華夏永御無疆之歷固安不拔

之基

徽宗皇帝寧德皇后上仙薦疏

伏以日月告凶天地震裂攀龍罔逮御辯已遙凡在照臨豈勝推崇伏惟太上道君皇帝憂勞二紀化育萬方逮北狩之不還劇函生之延企伏惟寧德皇后坤元柔順屯難遭迴法宮未返於椒蘭贈襚遽陳於梓狹爰假大雄之妙力以資仙馭之神游伏願威靈在天並生兜率福祚垂世寧壹寰瀛

功德疏

石紐發祥天命丕顯猗蘭鍾慶邦祚有開凡亭育之範
圍贊延鴻之睿算恭緣願力祇叩佛乘仰十力之覺茲
從萬方之懇願恭惟皇帝陛下堯仁舜孝禹儉湯寬憐
蒙海隅咸樂生而遂性金玉王度益固蒂而深根等久
大於乾坤齊光靈於箕翼

詮老再住智者疏

須彌最上之層不妨進步渤海無邊之際復有返流已

固必以適時斷去來而解脫設或迷於作相祇見笑於大方詮公禪師祖派的孫僧中先覺藻飾焉用圭璧自清首開甘露之門心在水晶之域勇擊蒙障妙闡宗乘無著孤蹤忽飛錫杖紳笏苦空之友雲水叅寥之徒祈常依於慧燈願再鳴於法鼓既四衆悉推輓為一大事因緣合浦還珠世人之有分驚山浹雨物種種以皆霑仰惟翻然允從衆志

天申節疏

祥濟發而社鳴錫符睿聖德休明而鼎重祚世延鴻西
竺演文南山增固伏願皇帝陛下因天所授如日而躋
降年倍於勛華八荒壽域闢國競於唐漢九有渾同

請天寧華老疏

妙解脫梵音雷霆警于眉瞶自受用三昧日月揭于冥
迷溥分光以襲明更敲空而作響所謂無礙正法眼藏
是名慈悲捩鼻孔機華公禪師學苦行尊探赜索隱僧
中龍象人裏鳳麟背盧霍以嚮金華闡毗曇而遵般若

躋堂入奧植拂拈槌籍籍祖風知源流之有自森森法器振綱領以當仁帆亦渡海而依風雲不擇地而致雨光孝佛刹先朝道場不憚象駕飛空之勤趺觀貌床無畏之吼雙溪在目漱流演千偈之談東臯有秋香積備八珍之供囑佛慈護贊聖無疆

淨土塔求化僧葺疏

伏以三百尺之磴梯攀援天界九一層之欄柱標表梵王想營造泗濱曰觀國師顧興崇婺郡云釋居政證果

無上象教最尊淨土招提浙江名刹往者甓運增埤物
外雄夸於空碧材掄疊拱翬飛翼跋於仙飈曩聞鈴鐸
釤鐺斯時鸞鶴栖止日照重輪之五色月出自白毫之瑞
光回祿而棟桷灰埃精廬之龍象索漠求化冠纓女士
宗奉般若菩提累一木而福高岑樓施一錢而惠霑沙
界不厭抽釵脫釧何妨積錠堆金遂成輪奐之卓然感
召休符於雜沓凝機却厲必屢豐年祝聖延期永躋壽
域

記

常山縣主簿題名記

衢所隸五縣西曰常山溪谷迴阻曩時號為巖險僻左比年聖上駐蹕臨安冠蓋旁午甲兵往來乃江湖閩廣水陸之衝塈為孔道津驛廩庫之吏與其輿臺迂勞無虛日事倍徒於旁近他邑然縣令之次有尉無簿夫百里賦政非有佐貳何以辦治譬如羽翮修而鴻鵠舉宮商應而琴瑟調苟補左而缺右有唱而弗和殆不濟也

簿之於令聯事而不逼分勞而不專上下咸以置之為
便紹興四年二月庚申資政殿大學士宣奉大夫陽夏郡
謝公任伯知軍州事言於朝吾友韓君昂子平實被選
辟越三月某日奉命視事因舊廢館繕公廨焉君以謝
公見用之意不陋枳棘不懈箴儆所治雖小務知者大
出入朱墨鉤校精覈一毫必利於公上一豆不落於人
手於文無害其長蒙成衆謂稱其職至於沿牒而稽經
決獄絃歌而乘間攝縣嘵呻纖悉情偽洞曉蓋有補當

今見思異日者甚多焉故當路數數薦之逮終更伊邇
書來告曰凡官舍皆刻石題名創制茲職肇自我先子
為記之以貽後政之君子余竊以古人謹始必書夫興
廢當理則見稱圖治宜民則可紀可紀雖黃綬傳不朽
不然雖千駟無足道矧賢牧伯之首建明而吾友効官
如此不患湮淪也姑妄書之紹興六年六月十日眉山

蘇籀記

題跋

跋摸連昌宮辭

伯祖東坡先生嘗為易傳以真書發揚伏犧西伯之旨
嶺海草書老筆精勁自云不愧二王遭亂後家藏書帖
散失略盡尚明所摸連昌詞頓還伯英舊觀而過於賀
拔恕數倍矣書雖哲人細事心慕手追如此其大者鮮
不深造故余三歎而屢嘉也紹興改元十月日蘇籀題

跋海棠夢大字

猗歟偉歟如見真本庶幾遺範贋者果能亂真耶但瞠

然慕歎耳嗟夫世人不得於心勿求於筆其或筆驕心不競也勉哉到聖處可謂善學矣紹興二年季春下旬

蘇籀題

跋東坡拔豕帖

先生蚤年在岐下寫楚詞一章云似鍾繇行體筆能趁意是時書畫已絕出世俗自壯逮老周游四方古人奇蹟無不臨遍嶠南書帖特為超妙嘗戲語云可比二王所謂七十而從心不踰矩者也嗟夫雖天姿殊異亦須

精習始蹈大成況常常者其可不勉耶

跋惠州芳華洲刻石

延平范公智聞使君恬于榮進自詭治民不鄙夷嶠南之俗鷺城左江右湖想其城如提坊民如鴈鷺屋如舟舫樹如菰蒲故有古勝嘉名造物特發其祕以遺公觀公與諸賢所記備矣或曰荒裔茅篠與蛟人蜃戶錯雜氣祲毒霧發作無節非華風矣惟公能以循吏惻怛之實盡心撫育令聞曠然以光茀厥茨芳化為教建物無

疵癘而戶口增山有嘉卉而桑果茂尚儒而士甚文遏
寇而民益豐芳流華顯名不虛應公夙有詩識與今石
刻符合豈偶然也哉期公奉三年計最歸報九重用其
實學藻飾寰海使品彙無彫枯焉嗚呼出處有命皆非
人力世人妄生欣愾誤矣覽芳華洲之事可見也

題崧嶺圖

錢

服道篤習水墨幻雲霧走山海筆力尤壯細察其層疊
高下施設算數繁悉妙忽出意無窮體乎天造獻於人

情可謂精能老而不勦者也尺素片紙極目灑落此圖
僕故山也觀二室間林壑寥落使人增感懷耳

跋任氏東坡詩及所書黃門記

嗚呼二祖道德之範見於筆墨傳示來世不容擬議觀
其述二大夫樂賢之意炳然著矣辨書真贗僕粗能焉
古人謂辭之不可已故勉而題是歲九月丙辰

跋般若心經後

佛告舍利佛般若第一義諦無心而成正覺初祖國師

頌釋益曉然即羣迷為聖智照大闔為光明衆生勤念
本源自性由此致悟潁川元輔意珠融通齋心所畫虔
奉般若志願篤矣以梵夾示余欲彼此同證善果不容
無言紹興丙寅首夏中休日眉山蘇籀題

書三學士長短句新集後

予晚生希仰前脩汲汲與能耳目屢接典刑故老喜如
獲麟鳳饗於昏懵不知而作者論文拊卷每每興歎顧
念九原莫作述者有迹可傳不忍置也曩日正始羣賢

在朝黃秦晁三公騫翔臺閣追想其奏篇大庭垂紳文
陞據梧揮犀石渠東觀質據辨析泯然邈矣所餘著書
名章大論煒煌照世其樽俎折衝欵昵名勝高酬妍倡
以夷猶寓意融金石感鬼神咸韶雖隱陽春白雪猶將
鬃鬚焉其風流雅尚之最吾人所欲珍緝實天下奇韻
嘉聞也喻夫東阿豆萁之敏子敬蠶種之墨淵閒情
之賦三公度曲與此何遠嘗竊評之黃太史纖穠精穩
體趣天出簡切流美能中之能投棄鎬斧有佩玉之雍

容秦校理落盡畦畛天心月脅逸格超絕妙中之妙議
者謂前無倫而後無繼晁南宮平處言近文緩高處新
規勝致朱絃三歎斐麗音旨自成一種姿致槩考其才
識皆內重而外物輕淳至曠達學無所遺水鏡萬象謝
遣勢利湔祓陳俚發為新雅有謂寓言罕能名之三公
同明相照並駕而馳聲稱彰灼於天下斯文經緯乎一
世淟涊忍萎敝剽裂無稽之徒熄矣吾儕鰣生諷詠喟吟
剗目娛心痼文字之僻昔謝安石中年傷於悲歡與親

友別作數日惡王右軍曰正賴絲竹陶寫耳嗟夫吉日良宵賓主酣飫笙簧嘈雜使曠世纖阿之倫求語意之相類窮音調之抑揚上激青雲蕩泄吾輩曾懷所謂陶寫也楊惲耳熱烏烏梁鴻五噫狂歌亦茫眇耳烏能逮此哉或曰耳非夔曠安知幻妙之音荅曰三公之詞非專玩而獨鑒者實四海九州有識之士共焉故予言而不僭越耳

跋伯時二馬圖

先祖黃門喜顧陸王韓遺迹龍眠集三馬見貽效之者三人其風儀雄傑皆可任雙鉞三槐所馭殆天廐之龍也兵火後粉繪羽化惟絲字賡唱在檻今觀此髡髮間感舊屢慨而已紹興辛未秋孟蘇籀跋

書輞川圖後


余搜務倥偬汨俗浮囂煩促海涯諒度甄遣涉筆占位不謀食息願釋此而清其思卯酉進止寒暑罔避搖手而吾僚發議動足而簡書鐫詰悔恪雖遠荒嬉何裨願

置此而新其說有憐而示之以唐王右丞輞莊矮紙圖
披閱屬爾洒然慕之按摩詰開元詞宗張曲江之容孝
友禪悅書畫絕世仕而屢歸其區處門間標範山藪新
規奇槩淵兮卓哉曠達騷人之思也其疏舉二十許處
城坳岡坂葺宇上游編管裁杏木欄聯柵茱萸澗蒼槐
栢宮蔭篠簜嶺寧北南湖垞霏浸煙霞膚塵遠迹人之
虞沿涉信舲艤之適亭臨清泚柳翻碧波蘂瀨白石萬
拳金屑少飲千歲檀欒為里吟歎琴蕭韋夷為車桂旛

自舉有用故割之林蕃衍遠條之圃山居之殊勝詩眼
之識拔如此予壯歲游藍田不暇搜覽弔古良可恨也
蓋城市煖熱泉石寒涼往往負炎捨冷誠知簪笏圭組
不在崧少濛濮高蓋駟馬豈若柴車煙艇歟於噫余老
矣辯論著造不少貶而懈顧何益焉游止溪山希真泰
伽斜川愚谷誠不易可圖也玩味默存其間無湫隘塵
囂之陋又無顯嚴高明之瞰林端水次莽蒼縣幕傾峯
阻徑巖豁谷迴嵐光素雲自相蒨絢鷗鷺之賦蒐裘之

營真趣蘊鍾乎此矣主人既以斯畫見貽置之坐右朝
夕寓目抑流競養恬素為幸豈細也耶金穴雕堂之家
玉塵象床之靡無施於丘壑矣紹興辛未孟秋眉山蘇
軒

篇題



欽定四庫全書

卷十一

卷十一

雙溪集卷十一

欽定四庫全書

集部

雙溪集卷十二

詳校官石中允臣薩敏

主事臣呂雲棟覆勘

總校官進士臣繆琪

校對官原任典簿臣郭祚熾

謄錄舉人臣查浩

欽定四庫全書

雙溪集卷十二

宋 蘇籀 撰

啓

代謝呂丞相啓

右某蒙恩受前件差遣已於某月某日赴上訖分安僻壤自便養疴祇奉恩光仰煩造物攬轡沃若握節慨然撫民夷風俗之殊幹山澤財幣之夥詳味獎予恐懼叨塵伏念某少不逮人老來更事初無進擢之望終冀循

良之稱華省振纓窮途失子哀悴所迫哀疚相仍懇惄
一陳光榮曲被此蓋伏遇某官帝所竒寶王佐異才社
稷元功掃閭闈之氛侵邦家係望補袞職之工能國是
定而紀綱明兵勢強而姦邪伏書鼎彝而顯赫大陶冶
以挺鎔致茲一介之微亦獲寸長之效量才受任藏疾
包荒某敢不収晚莫之桑榆增太山於塵露庶幾一簣
以補萬分過此以還未知所措

賀張樞密啓

伏審誕颺宸綺全付樞衡復辟云初論功第一黔黎大
慶將相調和獲此其贍榮逾倫等竊以北巡未復謳歌
先歸南渡疾趨環衛寡弱值汲黯之在外顧公孫如發
蒙變生雙闕之前援乏它師之助介甲而呼者為吠堯
之犬伐鼓而奮者揮誅錯之戈孟賁駭於狂童神龍制
於羣蟻天地尚顧於邦國朝廷豈乏於仁賢皆力薄而
勢孤雖心非而口諾毛先生以三寸之舌使趙重於九
鼎周太尉以一呼之袒安劉氏於太山古常有之今則

復見伏惟知院樞密剛大塞乎天地忠義一於死生有
旦莫千里之才有吞納百川之量步武青雲之上身名
北斗之南捧檄者百列城聲飛仁者之勇同心者三大帥
汗流烈士之顏君王正位於法宮將士悉還於天仗見
股肱爪牙之助察脂韋首鼠之徒消惡運而遏亂原抑
姦鋒而奮誠節解腹心之疾而罔施箴砭除城社之鼠
而不假薰燔天下隸之軍中肅若深悼艱難之國步共
思英毅之王臣顧得失存亡之秋非蓄縮鄙凡能辦以

閣下妙齡之人傑立朝端允代於天工必進任於元台
益更張於治具中興可覩大業彌隆相袞命圭分固當
於得鬼兵機國事目不見於全牛念祖宗之法度可循
講賢哲之建明未泯何止江南之王謝定配中原之管
蕭箇玷桑梓之坤維仰節旄之公府方且揚眉而吐氣
不勝饜目而愜心歡交通歎咏不足無任為天下喜
忭之至

賀謝參政啓

伏審入觀嚴宸延登近弼虛襟前席咨大計而條陳運
規從繩獲真賢而柄用巖石增峻飄風自南立政平章
同心叅貳竊以左右洪造執持大權弛今日之憂慮講
當世之備禦可為痛哭者非一如解倒懸之未蘇天子
思治勵精志勤宵旰元臣遠猷辰告力振綱維武夫虛
驕殆矣偏見文吏叢脞疚哉淺聞廟堂須不世之才著
龜戒往事之失實符人望宜亮天工恭惟叅政相公斷
金割裁絕塵超邁識邦國遠大之體得軍旅信伏之心

論思代言窺伐苗命說之作解紛排難卑射聊喻蜀之
辭惟其正色而立朝固已折衝而却敵仁厚惻怛副黠
黎饑渴之時賞擢精華致豪傑興起之助太平之責允
塞勲庸之盛當然籀入道不優登門為愧鱣堂之瑞久
矣伏膺牛角之歌舊蒙採聽崎嶇執轡齟齬斷編無勞
可書有局自效風俗四維之克舉芻蕘片說之必行竊
聽倚毗佇觀施設王度金玉共式昭於德音人材茹茅
益廣開於賢路仰頌之喜敷述難工

賀富中丞啓

伏審簡在宸衷擢領風憲任隆獻替用乂捨攘當大有
為蓋非常選多士攸慶前脩不亡竊以道不虛行人惟
舉類念昔烈祖之輔有如鄭公之賢門緒蕭然聞望卓
爾廟食赫奕鼎彝著明後昆是似其淵源世俗豈知其
髣髴取故家之成效在高位必仁人溫故益新象賢崇
德典刑有自箴訓可追今海岱失於太平而黔黎喪其
常產約已陳錫將以收敵愾之心公聽使能將以建勳

興之業此意甚切厥功惟諧從容訪道之求類非俗吏
之事必明哲同于山甫而剛大比于孟軻其智辯足以
平厲階其仁強足以遵美志沉應曲當無頗至公伏惟
中丞妙講規模深識壺奧蹇諤匪躬之節高奇足用之
文論思甚確而朝無闕遺執法允明而士知趨嚮聲郵
傳于天下謨輻湊于上前定傾不平制勝未戰求懿德
而肆時夏總羣策而殄妖氛諛鬼姦魂巨蠹囊煩于白
簡散材泛駕小疵稍洗于丹書知無不言允副殊眷位

鄰揆路遷補擬漢之大夫進參調元圖任方今之近例
篇粗為君子所與竦聞長者之風讀先正之書愚不晞
其萬一拜高軒之日理有契於三言瞠然超軼之蹤率
爾狂狷之作慶咏之切敷染奚殫

賀富知院啓

伏審丕奉寵休擢司宥密聲實無忝眷屬益深凡在芘
庥與有榮耀竊以有世臣者所謂故國建明德者其後
達人豈特為階闈奇異之觀實能任邦家輔相之美以

才業之絕異正名位之穹隆無替茂勲復仍舊貫副朝
廷之企佇厭華夏之傾瞻惟茲右武之要權思得佐時
之機略雖俎豆墳典之事吾儒守文而鼙鼓金革之間
諸將易得措世大安則有道使敵遠遁則責謀頃刻微
差安危所係呼吸生變裁處尤難折衝於帷幄之間度
兵於枕席之上六奇五間之策應可無窮九流七略之
術何所不用是由文墨之士自許驅馳之勞側聞登庸
實允僉議伏惟樞密端明性與道合意叶才周閑戶揣

摩已儀式文王之典前席獻納實啓沃高宗之心有長國家之令名以安社稷而為悅約身厲操比盧懷慎之清因事建言若蕭望之之正屢酌獸樽之美痛繩舊洿最詳馬棧之施獨予善類務農蓄聚訓兵俟時以伐謀為奇功以自守為進取馴致遼夏之修好庶幾魏晉之復歸度越前芳非但無愧籀末品下秩絲力散材不因筆牘之儀文莫叙松萬之附倚意嚮殊切宣寫難周

謝顏門下相公啓

伏以樂附德門實勤頌咏過形薦牘曲被矜憐言重鼎鍾先生腐朽飾說嘗干於百里載名敢瀆於三公自緣顧念之私乃致恩知之誤竊以自別於常人者必有高韻辱知於大賢者盡抱殊能雖求之乘田委吏之間而察其輔世安民之具士難稱悵才鮮克堪蓋古今致理之權公卿報國之志獎擢之途忌隘汲引之門在寬拔十何辭得五猶半將以備委任之大豈徒掠好善之名方今智勇俱勞寇攘未弭宣華勛之澤而明俊德分禹

稷之憂而建勲勞裁成鞅掌之時殆由舉措之當凡有為而有守皆與明揚誠無黨而無偏豈容魯鈍此蓋伏遇宮使門下相公丈人自得者極至所履者醇深家傳亞聖之風世濟哲謀之畫允協一德參斷萬機居常緣督以為經不憚毀家而成國變理勞而事夥彌縫巧而功深逮燕處於琳宮問攝生於庖氏直諫無隱會聞汲點之名還末俗未敷宜使陽公之亟用恢闢風化保養遺黎捨我其誰考慎其相留意人物振起綱維天下將

被其休功國勢殆從而安固籀酸寒下秩流落寒蹤晞
昔仁賢讀古墳籍羣喧卑之俗狀困襪博之儒紳既蒙
品藻之優足改朋僚之觀益祈博約無辱提攜不間衰
窮眷殆倫於骨肉在夫臭味願終効於毫分過此以還
未知所措

謝閩帥啓

右籀被命天闕效官海邦未聞畫諾之誰歟忽覩除書
之騰播繼承開府競欲登門晞驥仰高已云積歲茫茫

附德寔獲素心道路交欣頑懦增聳伏惟知府安撫待
制儒術先覺朝論咸推辭綺心精才高行峻宜處巖廊
之上豐淹藩屏之維簡在淵衷益當重委蓋備嘗風俗
之利病得以為條教之弛張旄節舊臨何止昔襦之惠
鄉紳所在斯為畫錦之榮翕然大慰於風謠何特鄙凡
之受賜籀僚屬之內官秩最卑崎嶇隨牒之行艱窘喪
家之狀無伎自給待祿紓貧幸遇寬明稍矜衰朽庶殫
夙夜有補毫分

謝帥司舉啓

伏念每懷靡及寡過未能特達飛章貶屈鑒裁荷瞻燭之明恕忘蹤迹之誠微廣度包荒深仁扶弱懷檄愧汗僚友改觀竊以時運艱難才謨匱乏惟用能可以致理故體國莫如薦賢邀劇孟而拜尹逢事其可緩尊樂毅而起王翦勢固宜然筦庫之卑本何關於筭略判司之秩但稍擢其久淹既獲大田亦兼斂其滯穂別識勁草不遂僵於疾風拔十覩於五収慮千豈無一得顧甄藻

之已誤何事為之可稱此蓋伏遇某官頌丘索與祈招
多知往事拾甲乙之科第遍接名流叙事之文儼花鬪
葉方人之論虛枯吹生聲飛九牧之先恩浹八州之內
倦符魚之條教懷桑梓之菟裘朝廷方倚其才吏士願
依其德豈乏鄒湛之輩共登元禮之門猥以空疎驟玷
清舉籀歛歛憂國流落餘生潦倒何成麤疎無取力薄
不足以承緒業伎拙不能於謀稻梁親承誨音仰止託
賴孤學寡予世俗之所忽遺舊聞不憇寤寐之所詳味

年已至於不惑道應得於少分惟有進修是其志趣念
裨益之効淺徒銘刻之心牢策蹇磨鉛為山學海過此
以往未知所裁

迎柳憲啓

右籀伏念一去門闈十更歲律遁逃空谷渴見華夏之
衣冠劃覩除書肅振霜臺之聲采仰高有素偃風載欣
竊以遠民屢擾而難安諸偷乘間而竊發馭以寬恕則
愈生姦猾之勃心慘乎誅夷則累及無辜之衆庶臨遣

使指奉將美意於遐方果得耆英獻塞清刑之重寄豈
弟之誠允篤惻怛之實愈敦伏惟提刑中大龍圖窮經
最明覃思自得負抱佐時之略韜涵絕世之姿校理祕
文卓犖諸儒之冠剗煩將漕斡旋五路之儲逮朝廷宵
旰之時處詞館逍遙之適玉堂鳳閣方且登躋金節繡
衣復還舊物偉然素著之名績卓爾尊臨於吏民朝論
共推輿情咸悅筆端甄品屬城恪稟於六條柱後惠文
羣寇豈勞於併按籀鯀生無似驥尾叨榮佩伏知憐不

忘造次但深欽聳曷究憫悰官守所拘台旆殊邈

賀富樞密啓

伏審出綸揚命近輔陞賢樞政處中機謨密勿禮秩甚
重尊遇更光竊以副宵旰之求則無驚乎殊寵妙裁成
之業乃得位而可欣蓋論定于鄉校之游談望隆于將
士之節制蒼生懸命賴經理之遠圖有識快心懷先正
之遺烈赫赫愈著新新不窮致姦邪憚國之有人使寇
攘廻慮以革面裴度進而朝廷重召伯成而王心寧伏

惟樞密知院中大稽古制今懷仁附義以邁往之略承天眷以不倦之智收人才司耳目於臺端言必有中贊心膂于揆路知無不為懋深實之謨據醇積之學應對鄰敵折衝伐謀備禦盛秋據險知要惟其卓犖之度曾無肯綮之經咸具爾瞻無出其右枝傾補綻正九伐之綱維端本整棼慰萬方之飢渴善類增氣舊章舉行庶幾山甫之賢不忝烝民之雅籀附于龍津驥尾跂于鳳舉鴻軒念多事之且平獨空餐而自愧同獎王室或用

九牛之一毛走慶台階尚須十駕于千里敢辭藜藿之陋將恐桑榆之枯欽咏之私敷染奚既

謝程殿撰啓

伏念欽承嘉惠誤玷殊私度廣包荒恩多內恕修辭謇訥愧汗忸怩竊以選部典常公庭殿最銓綜既有成憲考課無失大綱雖奔軼凌厲之人以為拙宦而深實詳練之士多出此塗底績則其宣力也懃保任則其量才也審顧藉五斗更盡三年殫竭云為倘書中考詎勉或

經于三仕蹉跌有至于半生亦知京秩之微芒冀脫判
司之冗瑣籀之晚進自以寰空希當世之簪纓豈迂寸
步望前賢之糟粕未得一毫彼哉何堪缺然無取便合
倒冠而落珮豈期結網而羨魚華袞垂隻字之褒敝
增九鼎之重此蓋伏遇知府安撫待制警拔應猝慎靖
察微學惇及物之誠辭富輯民之辯窺典冊之淵敷援
引古今知議論之津源多識成敗故能擴將帥之韜略
寬國家之顧憂移檄駢聯斤堠絡繹金穀流行器械精

良厚結羣心茲為全策馬首所嚮三軍佇瞻旂尾一揮
衆悅屏息不出樽俎所恃機籌威撫冥頑部勒勇怯纖
悉舉措深副倚毗王良當車轡無詭竊醫和負籠劑必
珍奇至如籀者蹤跡飄搖燕幕榮芘羽翮推崇鷁表飛
馳老矣轉疎賤而有恥片言小物不敢代帥而受名秉
心奉公戒在侵官而冒上循循乎寅集而酉退稍稍乎
晝訪而夜思庶幾摩厲以須不忝稱知之實繡袞當軸
終賴埏陶詩禮在躬豈無云補再拂篋中之筆何謝囊

出之雖過此以還未知所措

賀翟參政啓

伏審光膺制命叅貳袞司股肱惟人典刑增重係兵民之欣屬符夷夏之傾瞻溫恭遜避以得之將順謀明之至矣洪惟嚮道之主必有命世之臣稽古以制今訏謨而果斷當天下之劇務酌時變之機宜首陳堯舜於前大安社稷以悅出於口而成於手塞其責而獲其名乃者給賜鋒車虛佇已久逮夫入親法座見晚興褒重煩

詞翰之林遂付機衡之位卓然自結於中宸俞哉甚眷
於宗工拱揖廟堂鎮弭橫潰伏惟叅政相公珪璋大器
鴻鵠高飛道有覺於後來才庶幾於前輩摘風騷之奇
致體訓誥之坦明邁軼兩京兼該七略偉中興之石畫
妙正始之金聲難進易退而羣士推提綱正紀而萬事
理久處閒燕無競榮光自得孤高公議咸予衆狂且禪
弃衡石而妄量道阻且長却駢驥而不御名望難捨時
命大來管夷吾治于高傒鄭罕虎知夫東里務在救衰

而已亂未嘗苟且以即安陸相之術彌精賈生之言悉用下九天之膏澤出萬國於窮途神助人謀淮淝俟常武之舉飈驅電掃河洛快匪風之思運動英謨已得全策並鼓作於賢傑致風俗於太康籀仰止門闈視倣繩矩誤垂善誘洞照空疎深思自託於陶鎔庶免排抑於糠粃于彼縣令飾小說以徒勞渾于俗徒謁大巫而自失敝帚猖狂于英袞蒼蠅瞠若乎芳塵誠依德範之崇不知形迹之邈喜而不寐允也大成玉樹瑤林盡歸倫

選朽株枯枿亦出菌芝竊仰雲霄垂蔭圭竇但切稱慕
烏能游揚

迎張大資啓

伏審釋會稽之組虛講讀之司改命魚符薦頌節鍼淵
衷異簡均佚民政之藩海徼東南悉屬天子之老維無
諸之都會雜禹貢之島夷瘠土勤民連年多事屢致竊
攘之寇尤難鎮靖之人老者安而少者懷非常才之所
任廉其頑而寬其鄙皆大賢之所長側聆休命之行實

諧中外之望誦十行之語上恩惻怛於撫存總八州之人悰俗慰安於節制威風覃被謠頌何窮伏惟知府安撫大資相公達六藝之旨歸該九流之倫類廊廟之寶柱石其才磊落萬乘之知烜赫千載之遇竭誠論列百神聽而兆人瞻將順謀明一德協而九疇叙頓綱正紀慮遠燭微湔滌舊汙憐愍吉士典誥大語追還伊傅之書政理高能遠過龔黃之譽出入將相師保羣黎輶坐論於公朝難久留於外服橐鞬羅拜改觀遐方繢矢先

驅叨榮屬吏平生珍慕邂逅遭逢大懼芻蕘有玷幕府
幸許揚眉于賓次欽聞溢耳之歡聲延跋來塵韻頑成
夏依嚮之至欣頌無窮

示徐漕啓

伏以命秩日邊假羽翰而干進論評月旦辱聲教而有
餘堂室高堅豈易鑽仰門庭浩博靡或不收惟私按黜
陟之間有辦治公清之舉悉取髦彥奚顧循常籀自媒
包羞冒瀆貽謗足將前而退却口欲說而囁嚅免於譴

彈為惠已甚塵于觀聽負愧實多黽勉衷情曲折布露
五仕委命七稔書勞憂患乘陵歲月二紀兵戈遷徙道
里百程犬喪其家棲託無所熊落于檻攀援奈何世方
須才時屬多事願翊皇輿乎正路仍拯生類于窮途事
國激昂之心孤憤曷已陳力衰賤之際守局胡為冀高
位之仁人拔孤迹於要地尚古人之不苟祿幸君子之
弗遐遺庶曰非愚嘗試甄寵伏惟某官廓度量于河海
鑠風采于雲煙致主憂民奉法循理併用周臣之五善

盡遵漢詔之六條望隆蕃宣譽振岳牧儒顯當代宜冠
從班課最諸州即歸朝右妙郊島為餘事纂班左之遺
芳題品則林宗子將知識則鮑叔罕虎銖稱寸度不失
毫分弦急韋柔悉承旨趣再念籀少也狂簡便慕相如
之名老矣不才竊附子臧之義求而後值喜同時之有
若人漫不知非推等列之多美士銓選冗璣難以發其
器能民政設施粗可崇其術業保持無恪補報是圖稱
於天下曰已知游揚令聞登上王朝而引達果決當仁

謝劉憲啓

右籀伏承牒命保舉某充改官親民任使者誤開藻鑑
収錄芻萊辭避靡遑慙懼兼至竊以陳力就列右賢援
能考課實而事績光髦彥作而流品辨中都有選曹之
銓叙方州任刺史之明颺人才由是盛衰國勢以為強
弱豈鄙判司之冗未嫌筦庫之卑違于家邦由茲汲引
咨于岳牧所幸稱襄通者必能舉窮顯者宜於索隱外
臺重寄所治無疆卒歲頒宣薦聞有幾豈期冗瑣在所

知憐使錙銖增重於鼎鐘而歛唾隨生於珠玉籀之潦
倒望絕陞華巢林一粒之資久矣安分趨市半錢之利
殊不欲爭素無狎俗之能安得佐世之具寡偶希合倦
飛拙鳴山窟海陬半人禽于生理天寒日暮恃舟葛之
常溫汝頽田廬岷峩松檟風土昔多于奇士門庭咸謂
之故家鍛鐵之步空名繫劔之樹合抱悲斷絃之莫續
號良冶而何為方且斂板走趨仰皇華之六德樞衣擎
跽窺理窟之一班伏遇提刑少卿入道醇深秉心挺特

厚黨勤類接下慎微世懲荆舒學推歆向悟宜官之波
畫似居巢之博聞使斧抗威百城以肅從橐歸覲羣公
先諧信櫟稼之辛箱欲扶搖於九萬昔樂天之思元亮
殊愛陶宗之人文舉之憶中郎猶賞虎賁之貌或出或
處而能同心無古無今其歸一揆嘘呵衰冷庇護孤貧
永惟此恩其何以報籀更當鑽研吏道靡敢怠遑恪警
官箴如恐弗逮勉自激勵不辱門闈求為可知益敦來
効過此以往未知所裁

錢任參政

右籀伏以記室響報不弃咫尺之書東閣諾延祇捧聯
翩之檄偉度英鑒優遇殊私訓鄙矜愚深容熟察拳拳
珍仰蓋謀道而非貧眷眷甄該致懷刑而後惠其為光
幸何以克當念古人之事賢欽盛美而歸往應對進退
之末講畫指授之多師親而習專業勤而志立咸號登
龍之士皆來隱豹之徒掃門執御以伏勞升堂入室之
尤密平時坐論於經旨它日擢升於廟朝依王公游殼

之榮華仕州縣抗塵之汨沒籀一介魯鈍十年具瞻才不副心求稱職而安在學無所就顧承誨之未間徒有耽古求善之情好節慕聲之願世不知而奚慍時所尚之爲賢希管蕭之榮途顧仇梅之末品求其遇合實難自媒譬如弱羽必棲於高松蛟龍先階於尺木蠅附驥而行地鵬積風而負天無物不然惟人由是况今詞林之根蒂此時聖上之疇咨一諾如錫於千金一見如封於萬戶狐裘豈容反衣不倦挽樓馬棧無取凡材何祈

輯附寸長尺短擣散液構悅於見知孰不奮礪此蓋伏
遇官使參政大資清純養素博雋通方協措紳之公言
被旒冕之聽納懲勞以日是之務優游於道味之愉學
識堅高謀猷邁遠斤破碎臆說之繆嗤浮謠少年之狂
稚意屬於本朝羣情待於爰立天下有未獲之事淵衷
念畀付之諧不止居季孟之間行且已楊陳之歎洗六
合而清氛垢維四方而撫瘡痍救民於水火之中行師
於几席之上為家國深慮而審畫寬君王旰食而宵衣凡

所賢愚於焉舉措籀捨筦庫而領邑陞從事而治中省循寸進之階誠為拙官之喜至若提挈不間乎棣萼吹噓悉取於弓箕曷嘗小補於纖微豈意薦叨於寵待籀敢不伏膺惠覩益勉操修積累錙銖增裨遠大舟駛輿壯亦祈衆力之同僕廣棟隆實惟羣木之助孰云小草無益高閣過此以還未知所措

改秩牋謝資政

伏念在浚城之旛進遷命秩上泉山之牘佩戴揄揚就

日望雲入朝法座跔天蹐地被奉恩綸高蹈龍津追廻
鷗路知人必當聽衆咸孚寡乏何人祇慄優論竊以銓
管千條之密鈞考五仕之嚴抑欺濫與僥浮慎裁量而
澄汰休迫之徒使其安分規矩之士豈不稍伸公論夷
塗真賢實績假令冒昧返玷高明如籀者倨僻迂疎孤
羈羈悴承學以詩書為業扞格未精吏道以法令為師
匪免無害二十五年于隨牒十生九死于亂邦隴月河
冰舊游最壯蠻諭夷落屏却未能思所以獎王室之圖

庶幾不忝天下之士祈臨機而趨事顧靡爵而敢辭非
搏扶搖則耕衍沃此蓋伏遇侍讀大資政淵源冲邃器
識穹宏洽覽羲皇以來若燭照而數計尊臨岳牧之首
如鳳舉而鵬骞嫵媚上前神明卓絕雄飛朝右風旨英
華燮精祲之至和消戎醜之姦悖亹亹過廷之誘拳拳
跪履之勤不倦題評見顧豈無於本末未諳補益狂狷
政賴於甄収虛徐進寸之階昂聳直尋之勢塵埃冠劍
吹拂有待於牛公翼謠聲歌減放必資於楊子幸阿陵

之廣納使品彙之備成厚義所存小禮奚用汗流湜籍
之後氣蘇管樂之前器使不遺願究上臣格天之業區
別素定亦使小草因地而生恭惟負鼎之心實軫納溝
之念過此以往未知所裁

牋胡樞密

竊以提綱而萬目起欲食者嘉魚鑄式而百體全願求
者善馬臯臯勞劇而始得多並蓄而後收物理當然
人品猶是周南之歎未已冀北之羣豈空使榮賤之勢

判然則視聽之知渺爾蓋掃除四海以為度調一萬彙
以為心聖賢所以驅馳風俗從而趨競巖巖赫赫高位
固有常尊勉勉遑遑寒畯思有所試凡挾養材之柄必
稟知人之明相期仁義之途相引事功之會附炎畏貴
則凡庸之所貪嚮道佑賢乃豪傑之所願開大公而廣
博奮至鑒以昭融甲第朱門何厭箴儆軍符侯印各祈
代更芻蕘肆言屠釣寡合豈習熟卑隘之仕路而鄙陋
恬曠之山栖入吾選中易於籠絡居吾術內罔或遐遺

朝廷不可以空虛天工殆急於分治拔十五而半獲得
百一于已知勤禮輓推甄藻題品天下喜樂人皆往歸
寶儲彌隆緩急獲用筵楹梁拱合輯而成廈臺萊榜粗
蔽覆而為山朝無曠官士無失職此自古類能之効以
人事君之誠不由茲途亦復何覬忌之則往而不返抑
之則汙而自羞樂同骯髒於泥中恥並伊優於堂上毀
裂冠冕欣屬林丘臨事而歎乏才治國者奚所賴藜藿
不保姦軌柰何籀塵埃粃糠草野聞見夙有事道之慕

久懷量力之心妄意古今自待者敢不厚繆耽義理俗說者非所攻居多長者之游許予非凡之操咀噍腐儒之執藝酣咏素王之典彞畫彈鋏而悲吟夜拊枕而太息蓋常處約自守泊如分終為壠畝之民無復視朝廷之列談王伯之餘策意廣心勞遇管蕭之亞流汗顏血指非有陸生之新語又如奉春之便宜何以少屈華簪遽叨後乘以嘉魚善馬之喻或凡鱗病驥之容上冒坯陶仰攀槐棘今明主勞精於復古銳意於陟明殿幄演

經儒耄重席獎遇忠義網羅放遺論辨從容舉直措枉
除擬雜沓念功計勞昔晉元中興多擢中邦之世胄逮
宋武北伐亦賴江左之人英砥礪百官係屬三府樞密
閣下登翼弼亮斟酌裁成積學高文冠乎當代潛計默
識準於古人戮力一心草士風之媿薄銜命萬里喻戎
醜之服馴綽然表餌之權開示丹青之信賈生之學相
埒君叔之勲未優介立孤標智辯寡貳方且極夔龍之
洪業體周名之處心三命益恭百度咸理至於好古而

信求善無屢雖居功德之崇略無高抗之累故籀近者
忘其疎逖飾其顥愚拜揖奉承神思消發宜在擴而不
省孰謂高而難親徒步貴門計拙百僚之下樞衣末坐
蒙問五載之淹使其忘故園之思不至劇寓客之窘微
願易滿小價即酬粗給烝嘗不恨枯槁道前修而譽盛
德愈加令聞之光試家法以補明時庶幾先達之訓非
所望也敢悉布之亮惟垂矜稍緩誅譴

賀趙相公啓

伏審宸廷敷號鉉府策勲首冠冢司曇隆台輔羣公稟
承於處決含生鼓舞于設施朝廷愈尊國勢增重凡居
大苑何啻小康竊以國之隆興必有命世之佐士之光
顯蓋逢知已之君磊落殊常之姿得於考慎特達難酬
之遇猗于經綸帷幄疇咨廷臣莫比爪牙宣力廟略居
多逮戎醜之克寧嘉指蹤之成功眷隆極品之賞寵褒
特異之功恭惟某官兼文武之資好帝王之學擴持綱
之大度守補袞之小心白簡霜威嘗落姦邪之膽追車

日下再掌宥密之機副叶虛懷從容爰立霖雨未敷于
三日羽檄沓至于百函制勝安邊恨用休璟之晚御軍
却敵悉皆毅裕之裁威令嚴明將士奮勵遂使僭盜之
類落吾術數之中解腥穢為樂郊決贅疣於俄頃方且
扶持正論削庶事之厲階撫輯黎元為百年之長慮熟
講全策以防盛秋富民振兵實舉措之優裕治內服外
諒條畫之無遺以我自守之餘圖厥進取之計符移汴
雒知猶子之不足擒表餌龍荒見黠虜之將屈伏允塞

中興之責捷疾亨泰之期籀仰止門闈嘗辱顧盼恭惟
格天之輔譬如涉海之舟不容一木之或虧豈有一夫
之不獲尚祈草芥亦與甄陶欽聞休命之颺倍切輿情
之喜

賀張參政入覲經筵啓

伏審竦傳急詔欽想趣裝麟趾金華異等殊渥紫樞黃
閣虛位以須中外樂聞士夫交慶籀嘗備官屬企慕光
塵忝荷帡幪倍切欣喜竊以明主好要理世須賢惟幄

疇咨春秋起廢招延舊德開濟遠圖慎人物之評求討論之益上意先定僉言允諧蓋貫悉古今故能為萬世之慮博約經術乃猷服羣士之心其在當今無逾執事伏惟觀使侍讀大資柔嘉維則信美且仁莫除波瀾臻極壺奧高文典冊挽廻正始之音經武振兵允有中興之策夙參大政未究訏謨愈練典刑不擇劇易凜然岳牧之首蔚為議論之宗惟憂國飢渴之心見給餉艱難之日至尊歎蕭何之傑訓詞襄韓滉之勞輒保釐於藩

維俾左右於天造贊襄于規隨之際斟酌乎獻替之間
建功名於鼎彝形歌頌於竹帛再念籀罷秩三載待次
一官犬喪其家託迹無所熊落於檻攀援奈何敢懷僥
覲於超陞自安分限之涼薄惟流落之未艾更貧窶以
難堪仰止高明未遂遐謹使霖雨偏潤於枯槁丹青粗
變於嫫妍極拔窮途允歸洪造殫竭頑質少答深恩

賀張參政啓

伏審上眷舊勞復還大政命傳疾置罔不僉諳道路欣

拜於鋒車搢紳騰詠於綸綺事繫國體喜溢民情前古
建極之君至精考慎其相風雲感會霖雨敷施雖天縱
日新之姿亦人謀弼諧之助恭惟治本要在得人核實
循名較脩量短驗於已試簡其真才莫如孟子之恭王
必曰仁義亟召穆之而翊亮同濟艱難迫促詔音參陪
道論凡密勿邦家之務待疇咨國老而行相時會通若
驚受寵伏惟叅政相公金玉玉度著龜帝謨望峻烏臺
詞高鼇禁梗議無隱砭世之肓清節無華幹國之蠹若

安世而簪筆持橐如次公而增秩賜金以萬姓勞苦為
憂以四海焦枯自任著書傳道趨聖域而優長重席談
經發睿學之高妙文士宗其題品武臣賴於撫循寡悔
與尤當世誰比或出暨處底績見知數移百六之秋運
際升平之日督勵耕戰寬恤閭閻頃振綱維善厚風俗
拯遺黎而迓簞食賓左衽而係長纓允副淵衷之懷果
慰天下之意霸姜微管似此得君而成翊舜命臯豈曰
安民之易籀夙事芙蓉之府樂逢桃李之蹊被挹拾蘊

藉之餘犯而豈校儻湔洗照臨之末公生至明竊惟屏
退之蹤豈忘致恭之禮矜恤孤拙祇恃仁恩欽想于衷
敷述奚既

賀陳叅政啓

伏審光奉宸章進陪國論誕告遐邇歡欣交通伏惟慶
慰竊以內修外攘之艱大勞小康之後惟道德才諧之
醇固所以拯患而致祥惟將相士民之協和所以同心
而造事志於斯者或昧其術謀於斯者或攬其權大政

之幾非賢不以必也抱魁壘之質挾清警之資故侍凝
旒則聽納被知逮居黃閣則寅恭竭盡籌多而勝業廣
惟勤中國倒懸告猷能解生靈淪陷援手釋憂如通閑
破結發越人之藥石若引重致遠輯造父之轡銜在指
置之錙銖係安危之輶輶故廊廟虛位妙簡間清忠摺紳
公言莫如執事伏惟叅政姿稟絕異規略最優沈涵仁
義之淵點黜詩書之圓典司八璽宿學儒宗勸講六經
每糴皇眷夙夜匪懈密勿贊佑之功諷諫從容啓沃多

聞之益韓厥為人之不黨子產臨事則慎辭國著蔡而
世表儀帝股肱而天筆舌報堅昆而諭渤海檄巴蜀而
射聊城倚馬操觚祛迷決曠尺一有中和之氣方隅識
睿聖之心布繁悉化俗之言播委曲難諭之旨陪鑾扈
蹕造膝虛襟酌古今而處便宜預圖畫而補遺闕允執
大柄光輔明時殆將致主於唐虞自信許身之稷契引
類而真賢舉勵精而治功成需其源流素所蓄積籀夙
叨獎飾幾免牢愁綸綺頌行喜而不寐光塵耿末仰之

彌高縣宇蒙庥偉哉造物餘波所澤盡出生成素愍榜
疎豈遺賤遠頌詠之切敷染奚殫

賀趙丞相再入相啓

伏審被召鎮東來歸揆路注清衷而爰立採黎庶之公
言簡賢允念於前勞用舊莫先於元老誕飈孚號胥慶
輿情竊以協一德而冠羣公維四方而調品彙夙契風
雲之會纔遇干戈之虞道遠心勤務繁日淺效著明於
詳試績靡究於成能欲盡其施設之方必假之歲月之

久遽輟調羹之手豈伸負俎之心條得失之將然灼籌
畫之可倚增廟堂之嚴邃還魁柄以彌綸任責不平允
酬殊遇恭惟僕射相公學尹望之術助堯舜之明恢恢
乎肯綮之間炳炳乎付授之際燮理精祲察玉衡之端
綏靖邦家無金甌之缺邊實將勇當朝闢國之召公民
肅吏循斯晨化俗之楊綰惟用意之高遠故圖畫而必
成解中原之倒懸配前修之竒士籀自惟疎冗嘗誤生
成一毫何補於門闈即日中傷於脣吻孰謂根莖之弱

亦湔霖雨之秋儻一觀東閣之美將稍釋衡門之歎日
者驅策之意時哉幸會之期竦忼之誠敷寫奚既

慶常中丞啓

伏審弄印宸嚴首膺屬任專席朝右祗竦觀瞻臚傳邸
音義當贊喜伏惟某官聞見遠大體覆醇深談王霸施
為究古今要術寤皇明之思治奮直諒以輸忠隆禮義
為堤防革蠹敝由原本寬黔黎於疲瘵葺典章之闕遺
沐雨櫛風不愆講藝握髮吐哺唯在用賢天地之間氣

浩然而弗撓雷霆之下身獨當而不辭敷文卓詭而契
上心建議精明而定國是赤墀言動紬繹倚相之良右
披訓詞潤色鄭僑之博一麾出守三節亟還受釐延問
於賈生揚觴難忘於杜舉初貳秩宗之絲絕遂執風憲
而糾繩悉協朝愈豈谷子敢薦卓然天獎如裴度召來
方今形勢搶攘敵情變詐所貴先勝之計姑為滅賊之
資俟寇釁端恃有德而獲天助制敵袁覽雖不戰而屈
人兵殆將督礪情媿贊宵旰之志分別忠佞為月旦之

評切當世大機紹前修墜緒無我而副公望許國而弗
隱情人曰康哉邦其庶矣籀分甘山敷望絕鼎彞逮夫
休命之揚豈勝不寐之慶佇仁賢之燮理舉明主乎升
平正始返於風規知舊興其膏澤欣頌之至敷染奚殫

雙溪集卷十二